

四庫全書

史部

欽定四庫全書

平定兩金川方略卷四

乾隆三十年乙酉二月壬子阿爾泰岳鍾璜奏言
據西路維州協副將董天弼知州王采珍南路游
擊宋元俊同知盛英先後稟報職等派安員分赴所
屬土司查驗各處毗連金川地方碉卡俱有頭人
土兵防守因飭各土司設法招徠並相機攻勦土
司俱言殄滅金川永除後患寔與衆土司有益俱

頗出力進攻至土兵攻勦得勝屢蒙重賞亦各感
激踴躍但郎卡因衆土司乘隙攻襲添碉愈多防
守愈密未能直搗其巢而各土司百姓連年坐卡
進攻又須辦運口糧實為勞苦惟恐力不從心及
至丹堪查驗所修碉卡雖可以保護官寨而金川
所據穆爾津岡堅碉林立從嶺下攻甚易而丹堪
自下仰攻甚為費手正在籌酌機宜適郎卡屢次
差人叫求因差通事往詢據郎卡頭人薩木丹僧

棟稟稱郎卡聽得父母官來此如兒女得見父母
急思叩見第恐各土司加害不敢出來郎卡現在
嶺上求父母官上嶺以便稟言凡有所諭無不遵
奉該員等以既據郎卡懇求正可乘機過嶺查其
碉卡形勢路徑兼可驗看虛實情形籌酌辦理因
即起程過嶺郎卡率領大小頭人跪接請至勒烏
圖官寨具稟一切該員等由穆爾津岡過格爾溪
至勒烏圖計程四十餘里所見山徑崎嶇層層碉

卡其散處番民碉房亦俱齊整去歲夏間近河地
土間有被淹其餘收成尚好沿路番民亦無飢色
現在麥子青稞俱已將熟似與平日傳聞情景不
同及抵勒烏圍傳見郎卡據稟乾隆十三年大兵
雁境郎卡與番衆已無身家性命蒙

大皇帝天恩赦罪免死我郎卡纔有今日如何還敢多
事至丹琪起事之由因乾隆二十三年丹琪無故
來攻格咱地方殺傷五十多人我並未報仇及至

二十七年丹琪土司欲殺其頭人阿咱爾納木結
伊投入金川願替我百姓引路往攻丹琪報仇我
因丹琪是有印土司不許攻其官寨惟佔取穆爾
津岡山嶺此事未經稟明父母官實為有罪如今
九土司連年攻擊我等所生兒女無人肯與結親
所投稟帖父母官不肯接收所請新印亦未蒙發
給如此拒絕不勝恐懼之至情願頂經設誓甘心
任過等語委員等隨諭郎卡汝與各土司俱係內

地所屬豈容仇報因汝侵佔穆爾津岡是以九土
司公同發憤合力圍攻此是汝自貽伊戚

天朝豈肯偏護金川轉使衆土司含怨今汝若執迷不
悟則勒烏圖噶拉依俱不可保何有於穆爾津岡
汝果誠心悔罪將穆爾津岡山梁碉座悉行拆毀
丹琪人口盡數交還九土司或能釋忿否則衆土
司必不肯歇手郎卡覆稟蒙諭退地還人等事不
敢不遵但丹琪上年搶奪金川作固頂一帶山梁

添修碉卡甚多其間又有三雜谷土兵營盤我若
全毀山梁戰碉恐衆土司乘空進攻如今願將戰
碉拆去五座其丹堪人口全數退還以見悔罪誠
心惟求分付衆土司撤兵賞結印信令與衆土司
一體承恩郎卡願甘出結此後再不多事即或有
欺凌者亦不敢私與報仇惟陳明父母官聽候剖
斷令欲遣頭人赴省叩見總督提督大人稟明心
事再聽如何分付委員等告以汝現為各土司所

攻若欲差人到省難於轉稟令視汝如何實在誠
心悔罪以便辦理委員等隨即起程仍回丹坭金
川當將所掠丹坭人口五十一名遣人送出又於
穆尔津岡一帶戰礮內拆毀五座惟山梁尚未退
還現飭丹坭及各土司仍舊防範等語臣等查郎
卡自恃地險礮堅防禦嚴密各土司兵力驟難搗
其巢穴是以自構譽以來並無乞憐之狀今忽輸
誠至此恐有別情因調委員等來省面詢據稱細

察郎于哀懇之情因見各土司時蒙賞賚而伊則請印不給具稟不收恐已見絕於內地且既感從前救命之恩復慮此後有

王師之討悔懼交并似出實情但番性無常不時仇殺今雖悔罪乞憐而後此是否常能安分難以預料仍飭委員駕馭令各土司設法進攻奏入

上諭曰不必二三其意仍持前議久而不懈自可成功况又無甚大費莫為屬員了事將就之議

臣等謹按金川侵擾鄰封恃強凌弱寔為衆土
司之患然彼時究未犯我邊陲明為禁約自不
必遽加申討若使各土司果能同心合力為洩
憤自安之計而殄此梗頑不靖之徒則既不煩
內地興師而足使蠻方永靖安邊善後之圖莫
有踰於此者伏讀

訓諭不必二三其意堅持前議自可成功實屬片言居要
第合九土司之意志而使之併力於金川是在封

疆大吏深體番情恩威兼用操縱有方隨時詳察
情形酌量駕馭以收其効乃阿爾泰等不能悉心
籌計俾協機宜令其久而弗懈而僅委之庸駕
弁員輒圖了事以番攻番之策既迄無成且致
養癰貽患爾時身任封圻者實不能辭其責

十一月庚午軍機大臣奏言臣等遵

旨詢問遊擊宋元俊現在九土司攻擊情形據宋元俊
稱九土司合攻金川一事始因郎卡強據丹琪以

致九土司公憤合攻以圖除害兩年以來亦經燒
其碉卡殲其民人掠其牛羊器械游擊在彼查辦
惟在九土司能佔郎卡便宜纔可進攻否則止令
照常圍困看有機會可乘再行辦理今郎卡畏懼
天威并感激從前赦罪之

恩已不敢出巢滋事况現在情形不過伊等自相仇殺
只應鼓勵九土司照舊圍攻俟有可乘之機奏請

訓示奏入報

聞

乾隆三十一年丙戌二月庚戌阿爾泰岳鍾璜奏
言據維州副將同知稟稱上年十二月二十五日
半夜聞丹埧額碣一帶鎗聲不絕當令該土司前
往接應見金川番衆聚集圍攻并於格藏嘉噶爾
河安設營截斷額碣道路至二十八日將額碣攻
破佔據並用大砲轟擊丹埧格藏官寨經駐扎綽
斯甲布千總袁國璉駕馭該酋連日撥兵援救又

於正月初二日催到從噶克土兵援助已將金川
所新設營卡攻開金川番現據額礪山景拒守又
據打箭爐游擊同知奏稱十二月二十八至正月
初二等日金川同布提克底聚眾攻圍巴旺卡
卡角燒燬寨房殺擄人口詢係巴旺頭人陸塔爾
弟兄勾引金川番眾以致卡卡角地方被佔現飭
革布什咱等土司星速撥兵赴援初四日革布什
咱及明正章谷嚕密土兵與金川戰於羅哩地方

奮力擊退等語臣等查丹琪巴旺地小兵單今被
金川分路滋擾亟需援助協攻現已飛諭綽斯甲
布三雜谷小金川草布什咱各土司併協力攻務
期捷勝臣岳鍾璜奏請

陛見蒙

恩允准令適有金川滋擾丹琪巴旺之事請候稍有定
局再行起程奏入

上諭曰看此光景金川又畧有猖獗之勢實當如何制

勝不可隱飾姑息

三月癸酉阿爾泰岳鍾璜奏言金川布提克底分
擾丹堪巴旺臣等疊次委員確查該處實在情形
今據奏稱此次金川圍攻額碩丹堪與之對敵互
有殺傷其格箴瑪讓番民大半棄寨逃走該土司
親往彈壓始覺稍安又丹堪頭人多有不和亦經
駕馭曉示衆心始定從前丹堪頭人暗投金川致
將穆爾津岡失守目下又有不和誠恐別滋事釁

自當以固結人心為要傳令土司分別賞卹頭人
土兵力圖攻守今丹堪土兵已同綽斯甲布幫助
之兵於瑪讓格箴修碉捍衛分布防禦又據丹堪
槍獲金川男婦三名訊供金川欲於額碉修築完
竣來取作固頂等語復飭丹堪即於是處添修碉
卡嚴密布置俟雜谷等處土兵齊集設法進攻又
據巴旺一路員稟稱金川布拉克底番人於卡卡
角山梁接連修碉前進續經章谷革布什咱協同

巴旺土兵分撥於嘉哩山梁築卡堵禦金川退守
卡卡角巴旺亦分兵於額勒圭齊堵地方連絡聲
援以資防禦又據該土司稟稱卡卡角頭人陸塔
爾勾引金川布拉克底番衆將卡卡角地方深夜
圍攻佔據所有小頭人五名土兵三十餘名及協
防之嚕密土兵百餘名或陣亡或被掠無從查考
卡卡角山溝內番民房屋被燒者一百有零且節
次奪碉打仗頭人土兵陣亡衝失者亦多我處土

兵本少若再折損即恐地方難保等語臣等查丹
堪巴旺勢力單微自不能與金川角勝尅日奪碉
克寨且須固結人心始可再籌進取已飭各委員
將被擾受害頭人土兵及離巢赴援各土兵量加
賞卹以示鼓勵其應行添修碉卡之處飭令作速
趕修嚴密固守務保無虞奏入

上諭軍機大臣曰此次賊番搶奪碉卡該處土司未免
驚惶失措金川在諸番中雖稍強橫若九土司果

能齊心協力聯絡聲援不難搗其巢穴但恐土司等因連次挫衄心存畏阻遂爾裹足不前致金川益得肆其猖獗究於番地有碍此等邊方小醜不過自相殘殺並未敢稍侵內地不至用大兵申討若僅僅小試兵力又恐于事無裨然金川所攻者非各土司之地乎苟人自為守亦不致失其土地若董之以官則各土司方以為當官差使而猶豫日生不肯奮勇攻拒久之將孱弱難振此亦不可不告之以為伊等之故

也該督提等當詳察機宜或於攻勦之事量增賞卹以勵其志或於駐防處所酌助軍聲以壯其氣俾土司兵目有所恃而不恐立効自當較易但須坐鎮運籌不動聲色方合事機着傳諭阿爾泰岳鍾璜將該處情形斟酌妥議覆奏

戊戌阿爾泰岳鍾璜奏言據各委員陸續稟報丹琪於舊有碉卡外添修新碉一十八座現有雜谷土兵及維州土練二千餘名分布協防其巴旺亦

於舊有碉卡外添碉七座與革布什咱嚕密土兵
八百餘名協同固守今若即用此防兵分撥進攻
無論人數不敷且各土司習氣每言之似銳而用
力不足惟土練稍知紀律各路土兵應須絲練分
撥董率並給以口料方能於防禦之外設法奮力
進攻至綽斯甲布小金川革布什咱業已委員駕
馭各於本境添兵一面防守一面進攻現據綽斯
甲布一路具報於甲索及俄坡等處派兵暗襲互

相攻擊殺獲多人而金川亦綽斯甲布連界處所
遣放夾堪搶獲綽斯甲布男婦數人綽首深以為
恨責令頭人力圖報復臣等悉心籌議丹堪巴旺
懦怯貧瘠防守尚資衆力若令進攻必須厚集多
兵方可張其聲勢臣等擬在維州土練及鄂克什
瓦寺木坪明正各土兵內酌量調撥三千餘名分
路遣用以資攻守第查丹堪額碯巴旺卡卡角此
二處山勢陡險賊番添碯盤踞集衆扼守勢須令

各土兵聲東擊西分其勢力方可乘間而入惟是
各土兵離其巢穴代人攻守勢難裹餓糧而丹填
巴旺地瘠民貧辦糧更為艱窘均需給賞口糧俾
之安心攻勦如能殺掠賊番奪碉克寨另行分別
給賞使知進兵獲利自必各圖捷勝庶於進攻有
濟奏入報

聞

己亥阿爾泰岳鍾璜奏言臣等查郎卡狡詐強梁

亦止於鄰近單弱土司侵其一二土司無論不敢
侵犯內地郎卡土司兵力稍強相距較遠者亦不
能稍為滋擾惟是各土司中如從噶克梭磨卓克
來鄂克什距金川稍遠或因事非切已稍有遷延
而革布什咱兵力無多不能獨力攻搗緯斯甲布
小金川雖堪與金川為敵不過於連界地方彼此
搶殺均未有太勝負惟丹琪已旺逼近金川但懦
怯瘠貧非惟不能獨力進攻即防守亦尚須仗助

臣等現擬於前此派用土練土兵內擇其精壯者撥與丹琪巴旺助其軍聲庶幾進戰退守有恃無恐至綽斯甲布小金川等若能奪力進攻雖不能驟搗其巢亦可令其受創現飭委員諄切傳諭使知進攻獲勝既得瓜分其地又可為伊等永遠除害並可得邀重賞如此駕馭以示鼓勵臣等仍隨時詳察機宜妥酌辦理奏入報

聞

六月甲寅

上諭軍機大臣曰九土司會攻金川一事相持已將數載尚無就緒茲詢之岳鍾璜亦未有善策以番攻番之計似難責効伊等并稱賊首倘知悔罪歸還丹琪額碩懇請網開一面施恩寬宥等語所奏未得此事要領金川侵擾土司乃番夷互相仇殺初不敢干犯內地本毋庸加以兵威又何罪之可宥若欲為解怨息爭之說潛遞消息令其設誓額恩此不過蹈綠營

虛誕惡習以圖掩飾耳目於事仍無實濟如慮賊首
漸肆跳梁須知懲創則預籌運糧密偵地利然後厚
集兵力分路夾攻一舉而殄滅之並非難能之事但
用兵究屬無名亦不值一辨至該督平日遣往宣諭
之員文職不過府廳州縣武弁不過叅游都守欲得
通達事體者頗難其人萬一措詞失當轉致悞事機
而損國體且傳述或有粉飾更不得該處實情就目
前大局而計莫若阿爾泰會同岳鍾璜親赴該地傳

集九土司詳悉開導諭以金川與爾等構釁殘殺並
不敢侵犯邊境本與內地無涉爾土司等情願協力
攻勦原徐爾等自為保守報復非中國欲籍爾眾土
司之力為勦滅金川之策設或金川敢作不靖為征
伐之所必及則以國家全盛之勢鋤強誅暴不過一
舉手之勞其事無難立就即如準噶爾之強橫諸回
部之駭悍不數年間悉已勦平收其疆土爾等豈不
聞知何有于蕞爾金川取之更不啻摧枯拉朽奚籍

爾衆土司之助手乎至爾九土司地廣人衆如果齊心奮力聯絡聲勢抵敵非亦難事爾等倘因循觀望致金川得肆鴟張勢必近者先被其併吞而由近及遠潛遭蠶食甚為非計此乃爾等自貽切膚之患于天朝毫無所損將金川果將爾衆土司盡行佔踞即當特發大兵擣平巢穴并將爾等地方概行收取改土歸流以永靖蠻服其禍福利害一聽爾等自行決擇毋貽後悔如此明白申諭則九土司必知猛省至

督提大員親臨該地即金川未必不深懾服或可召
之使來與九土司同聽約束亦無不可然此須至彼
酌量時勢隨機應變非有定形所能預為籌度也現
已令岳鍾璜回川著將此先行傳諭阿爾泰俟岳鍾
璜到日同會前往悉心妥辦具奏至現在各處情形
若何或有另行籌辦之處并著迅速據實聞奏候朕
再行降旨

七月甲申阿爾泰奏言

臣遵奉

諭旨俟提臣岳鍾璜回川同往番境相機妥辦至現在各土司於本境設伏巡哨尚屬嚴密及至催令進攻則以為無路可進必須潛由僻路暗放夾攻乃為有益無損其實夾攻殺擄無多且均有金川守礮番衆救應迎敵各土兵誠恐截其歸路即回本境是以攻襲多未能深入而郎卡見各土司防守嚴密日夜呼哨亦不敢輕入滋擾蓋現在情形如此臣俟岳鍾璜回川會同前往體察各土司是何

情形郎卡是何動作相機酌辦奏入報

聞



平定兩金川方畧卷四

欽定四庫全書

平定兩金川方畧卷五

九月庚辰阿爾泰岳鍾璜奏言金川與縹斯甲布
九土司攻鬪一案臣等會同出口查辦先令委員
傳示各土司隨於八月十三日起程茲行抵維州
據副將董天弼知州王采珍稟稱奉傳各土司齊
集丹壩適遇郎卡差人跪於嶺上喊稟願退碉卡
只求准伊差人叩見該員等委千總黎麟將郎卡

所差番人押赴前來其九土司之土舍頭人現已
集臣等當即傳見據稱九土司會攻金川原期勦
殄以除後患惟是金川地勢險峻異常多人防守
難以搗其巢穴連年守卡分攻各土司力量無不
疲乏仰懇施恩等語臣等告以郎卡自投誠來本
未干犯內地不便無故加兵爾等土司既因銜怨
合攻如能併力勦除共分其地永除後患亦任爾
等自為如其不能不必妄希內地發兵相助第爾

等因循觀望致金川得肆跳梁則是自貽伊戚與
內地毫無所損爾等宜熟思籌辦無貽後悔該土
舍頭人等稟稱郎卡侵佔鄰封衆土司實懷忿恨
是以定議圍攻第心力不齊未能使金川受創所
以不肯退出地方如今郎卡聞知大人親來已經
差人請罪如果郎卡遵奉約束退還碉卡各土司
公憤可平嗣後惟有各守巢穴亦不敢通同金川
轉致多事等語察其辭貌似屬實情越二日臣等

行抵雜谷腦郎卡復差大頭人當噶爾拉等來迎
稟稱郎卡前蒙

皇上天恩得保身家本不敢復行多事因為丹壩山梁
之事各土司連年攻奪我上年已遵父母官分付
折毀五座戰碉又送還丹壩民人五十一口不料
丹壩後來偷放夾垣我因無處稟訴念將額碉奪
取則父母官必再為我剖斷從此轉可以永遠寧
靜今蒙分付願將額碉退還其丹壩山梁上戰碉

亦願折去惟求博噶古一處留碉五座保守自己
門戶至布拉克底所佔之卡卡角已勸退還懇求
賞給新頒印信並懇許與綽斯甲布對親其赴藏
學經之喇嘛前為打箭爐拘獲並未求賞則世代
沾恩等語臣等諭以郎卡與各土司並隸四川管
轄乃不安住牧侵佔鄰封總督提督因此來清邊
界今據稟請願退額碉原是郎卡自求免禍若將
嶺上之碉仍留五座則與乾隆十四年所定界址

不符未便准行至求與綽斯甲布結親此係土司
私事亦不應官為辦理當經飭令速令頭人等領
諾去訖查郎卡一聞等處巡邊出口即差人迎請
退地還碣其辭似屬懇切臣等擬親至其地曉以
禍福利害如果感悔輸誠即令委員督令退還各
處碣卡清其界址俾與各土司同聽約束至金川
土司印信現貯司庫雖應給予但番性反覆無常
擬俟察看數月果屬安靜再行給發奏入

上諭軍機大臣曰阿爾泰等奏郎卡遣人懇請退碉息
爭及查辦情形似有將就了事之意金川與衆土司
互相仇殺本無庸聲罪致討且九土司各懷觀望不
能併力進勦以番攻番之說既屬無益斷無轉助其
兵力代為合勦之理前諭該督提等親赴該處明晰
曉諭原欲令細察番衆情形審度事勢以定進止如
果郎卡實心畏懼輸誠面求退還額碉不敢再行滋
擾或可察其悃忱酌量奏辦今並未身履其地又未

親見郎卡祇據所遣頭人稟懇之辭信以為實況其所奪之碉尚未拆毀侵佔土司之地亦未退還實在畏威悔罪與否尚未可定乃遽奏請給還人口喇嘛並欲給予貯庫印信與衆土司一體羈縻諸事悉遂其所欲適足為外者所輕殊不知番性反覆靡常現在懾我先聲姑為乞憐倖免豈能保其永遠不復滋事若止圖苟且了局何以尊國體而靖邊陲阿爾泰年齒就衰岳鍾璜又復善病設或各存祇圖目前之

念以為十數年後皆非伊等所及見不復籌出萬全
則是自貽伊戚倘此次辦理不善將來或仍跳梁滋
擾朕惟原辦之人是問伊等各育子孫家業又豈能
保無身後之慮乎總之此事若無從籌辦竟不必置
論則可而欲遷就完事敷衍塞責則斷不可著將此
傳諭該督提等知之

臣等謹按九土司會攻一案欽奉

諭旨令阿爾泰等巡邊出口直抵鄂克什各番巢穴明

晰曉諭蓋以前此辦理者情僅委之一二弁員
既未足聳動番人耳目亦必不能審度機宜多
方駕馭惟督提等前往巡查則聲勢盛大自能
警動各者即卽卡聞之亦必為如此親臨督辦
必有大舉之局或即欲掃穴犁巢亦未可定自
可挫其氣而驚其心

聖明訓示已屬至詳至切無如阿爾泰等不能體察情
形熟籌長策而一經出口轉欲借此以圖完局

并將存留之印信仍行給發不獨金川因此益
加玩視而九土司等窺見封疆大吏意多姑息
嗣後小金川既與金川狼狽為奸而三雜谷等
亦勾結而不可解及至臨以大兵猶必俟再三
鼓勵始能稍稍用命蓋實此舉階之厲耳

十月甲辰阿爾泰岳鍾璜奏言臣等自雜谷前進
道經梭磨卓克采從噶爾丹壩地方各土司及土
舍頭人率領番眾跪迎極其恭敬臣等諭以爾土

司與金川仇殺本係自為報復如果齊心奮力豈
有合九土司之力不能制一金川之理此皆爾等
畏縮不前自貽之患究盡爾等意思何如該土司
等咸稱金川地險碉多未能搗其巢穴常恨力不
從心若能令其退還額碉及穆爾津岡各土司番
民俱各沾恩等語查三雜谷土司知識短淺番民
懦弱而丹壩更覺人民疲敝察其情形自為保守
之意多努力進攻之念少及抵金川郎卡已將所

佔穆爾津岡戰碉折去三座並於康巴達地方率領土舍大小頭人環叩輿前臣等至金川拉必斯滿安營傳見郎卡諭以

天朝統馭萬國恭順安分者常守地方多事滋擾者即予勦滅即如準噶爾及回部自恃險遠致干

天討不數年間悉皆蕩平汝郎卡受

天朝赦罪大恩如果各安住牧自然常保土地人民承受恩典倘必恃強滋擾即是自取其禍汝本係土

舍業已令汝承襲土司請有新印第因汝與各土
司構釁所以未經給發今既情願退還碉卡各安
住牧此後果能安分自守應由該管文武查辦再
行請領印信至所請放回赴藏學經之喇嘛事亦
候地方官查辦郎卡率領大小頭人叩頭稱謝臣
等於丹壩暫住四日督催辦理據丹壩土司稟報
已收明穆爾津岡山梁並查丹壩無業貧民以牛
力籽種復其舊業用資防守臣等查郎卡賦性狡

詐自恃地險碉多於各土司不無輕視而其畏懼
王法亦係本懷前此與各土司互相攻擊雖經委員駕
馭而辦理未能窳要今蒙

聖明指示臣等一經出口郎卡聞風懾服及至其巢宣
示德威郎卡即退還碉卡獻出所掠人口其畏服
情形備見至南路之卡卡角現亦委員查辦奏入
上諭軍機大臣曰阿爾泰等奏自雜谷親至金川康巴
達地方郎卡畏懼跪迎業經退給額碉人口及辦理

各情形未免存將就了事之見前令該督提等親赴該處曉諭各土司原令細察番衆能否畏悟感奮或并傳諭郎卡示以天朝威德覘其情形若何以定進止並非欲招致郎卡完結目前之局也嗣據阿爾泰等奏行至中途郎卡遣人懇請退碣朕以該督提等尚未見郎卡之面率信來人稟籲數語遽令盡如其願未中此事竅要當經降旨詳悉飭諭今復據阿爾泰等奏稱親抵金川地方郎卡情願將所佔額碣山

梁並先後所搶各土司人口退還各安住牧不敢再
出滋擾該督提業經驗辦完結並面許以准頒承襲
新印及給還喇嘛人口既已允其所懇自不便復有
改移此時亦只可將錯就錯以完此案矣但該督提
如此辦理究未妥善不知番性反覆靡常現在始為
此乞恩倖免之計果能保其永遠不復更滋事端耶
即如從前辦理金川時郎卡曾畏懼兵威歸誠悔罪
今甫十餘年已不能謹守約束尚有肆擾鄰境之事

阿爾泰等自問一督一提親臨其地較前此平定之
役聲勢輕重若何而謂番酋竟誠心凜惕從此遂與
各土司共安住牧永無侵軼耶此奏姑從所請辦理
但該督提等遷就苟安未能體朕原諭大旨着將此
傳諭阿爾泰等知之

臣等謹按金川跳梁凶狡其勢不減不休前此
屢奉

諭旨令督提等鼓勵九土司以番攻番原欲傾其巢穴

永杜釁端我

皇上所以令阿爾泰等出口巡邊者意實在此乃阿爾泰等不知駕馭各番收協攻之效為永靖之圖姑息苟安一切從其所欲適以長驕縱而釀事釁伏讀

諭旨以阿爾泰等既經允其所請不便復有改移將錯就錯以完此案此蓋所以全封疆大臣之體而嗣後金川豕突鷓張已畢在

聖明坐照之中矣

十一月己巳阿爾泰岳鍾璜奏言臣等查巴旺卡
卡角地方原與布拉克底連界向為彼此不和互
相攻擊而布拉克底係郎卡之甥因遂佔據其地
添碉據守茲據委員稟報親至布拉克底押令金
川頭人將所守卡角之兵撤令回巢一面傳見布
拉克底土舍安多爾嚴切曉諭該土舍已各清地
界退還卡卡角傳令巴旺土司收明結報奏入奏

聞

乾隆三十二年丁亥二月戊申阿爾泰奏言臣前
奏請將辦理夷務餘茶息銀撥歸修城動用摺內
恭奉

批示將近日金川聲息如何據實陳奏不可粉飾臣查
郎卡自退還丹壩額碣及巴旺卡卡角等處之後
迄今各員稟稱郎卡節次於其所屬各寨核查
遞年所掠南路各土司人口共一百三十三名悉

行交出又二十三年所掠革布什咱土司之母及其人口亦願送還俱經各該土司收領郎卡並將伊女許配小金川澤旺之子僧格桑為婚其于鄰封各土司亦俱嚴戒番衆並無滋擾至郎卡所懇賞還喇嘛現已由維州交發其請領新翎一事郎卡另遣頭人賚領等語嗣阿爾泰等復奏言郎卡差大頭人來領新印臣等委弁一同送至金川郎卡帶領頭人百姓焚香跪接甚為欣感奏入均報

聞

臣等謹案邊外土司固不可使其日尋仇殺亦不可使其彼此勾連况九土司內如巴旺丹壩彈丸黑子固非金川所慮餘若明正瓦寺亦為形禁勢隔其力量堪與金川相敵而又逼近金川者莫如綽斯甲布及小金川小金川本與金川同姓綽斯甲布土司亦與郎卡姻親此即各安住牧尚恐其暗中勾結乃阿爾泰等既從郎

卡所請准與綽斯甲布相對而於郎卡將女許配僧格桑一事不慮其為勾結之由而轉以為與各土司和睦之証豈審於機宜者所為臣等閱是摺內郎卡將女許配之旁恭奉

訓諭此又伏一釁端當留心不可隱諱仰見

先幾所燭雖萌蘖之生靡不均歸

坐照厥後僧格桑聽其指族屢擾鄂克什土司而辛卯

夏間遂至同時蠢動及

王師進討索諾木既助小金川死守而美諾既克僧格
桑又入金川竄匿輾轉滋事維時實已兆端使
阿爾泰等仰惟

訓示早杜其朋比之端又何至滋蔓難圖若此耶

十一月辛卯

上諭內閣曰四川松潘鎮總兵永昌著調補浙江温州
鎮總兵所遺員缺著董天弼補授是日阿爾泰奏岳
鍾璜病故

上諭內閣曰江南提督馬銘勲著補四川提督

三十三年戊子十月辛未

上諭內閣曰馬銘勲著調烏魯木齊提督四川提督員
缺著董天弼補授

乾隆三十五年庚寅四月辛未阿爾泰董天弼奏
言據維州副將五福雜谷同知鄧英稟稱小金川
土司澤旺因鄂克什土司色達克拉信用邪術喇
嘛咒詛澤旺父子均在患病是以頭人百姓前往

搶奪攻打又據鄂克什土司稟稱小金川借搜取
咒經為名發兵攻掠寨落牲口彼此搶殺互有損
傷但小金川人衆鄂克什人少懇求救援查辦臣
等查鄂克什土司挾嫌咒詛以致引敵圍攻固屬
衅由伊起但小金川一聞設咒之語擅自發兵以
致傷亡番衆數百人亦為自取兩造均有不合雖
番夷相關不必盡繩以官法然小金川未免有恃
強凌弱之意自應嚴行查辦使其各安住牧當即

委員往辦茲據委員等稟稱查得小金川土司澤旺年老昏憤現仍患病其子僧格桑年少任性又有多事頭人為之慫恿其圍攻鄂克什僧格桑之事居多隨嚴飭僧格桑責以擅自發兵即應問罪據僧格桑覆稱色達克拉令喇嘛將澤旺僧格桑父子年庚寫在咒經埋藏地下以致父子患病至今澤旺病勢未痊百姓往搶咒經又被鄂克什傷損太多心實不甘如今父母官嚴責不應用兵自

當遵奉聽候查辦第番人往例殺傷人口應令賠
償罰在小金川與鄂克什連界之處原有鄂克什
三寨求惟小金川撥人耕種收穫以作抵償仍俟
澤旺病勢稍愈妥商回稟入報

聞

五月甲子阿爾泰奏言小金川僧格桑與鄂克什
土司彼此相攻臣已會同提臣董天弼委員查辦
茲復據委員報稱澤旺患病不能見人僧格桑取

其印信號紙另居一寨肆行無忌委員屢次諭令
撤兵僧格桑始則推諉必與澤旺商議繼欲親往
鄂克什與該土司修好及委員前抵鄂克什而色
達克拉見有委員可恃復懇請發大兵攻勦小金
川以除後患僧格桑見色達克拉翻悔遂復圍其
官寨添兵修卡又鄂克什係瓦寺土司之婿瓦寺
土兵代鄂克什防守達木巴宗碉卡僧格桑復集
衆攻圍雖經雜谷土練併力擊退已將瓦寺土兵

救出而小金川番衆仍即于達木巴宗附近山梁
添修碉卡且與官兵進勦之路分兵防守其意欲
將鄂克什久圍使其糧盡自斃或俟鄂克什土司
遷往地處可以佔其官寨實屬愍不畏死勢須臨
以兵威等語查小金川地界西俱接金川其南接
明正土司之章谷北連鄂克什木坪若綠營兵分
路進攻必需一萬數千未免費用浩繁即使勦平
其地亦不能改土歸流只可各賞各土司於事實

為不值若用以省攻番之策伊等狡猾性成事多
觀望一時難得其力擬派綠營官弁督各土兵四
面圍困搶其牲畜如果小金川力不能支知罪求
免再行具奏請

旨臣等現在親往詳查辦理奏入

上諭曰所辦尚是汝等既往情形自悉

六月己丑阿爾泰奏言小金川與鄂克什攻圍一
寨臣等奏明親往查辦先已飭令委員諭知今僧

格桑聞臣等親往惟恐大兵進勦隨稟情願遵奉
撤兵色達克拉亦懇暫留委員以為護庇惟是小
金川雖將圍兵解退而所佔鄂克什之地尚未退
還其據守口隘之兵亦未全撤不便稍為遷就臣
等一面責其退地一面令各土司環攻以示懲儆
現在熟籌定局交與副將接辦臣等回省辦理審
案科場事畢再行前往奏入報

聞

七月壬子阿爾泰奏言小金川佔據鄂克什地方
遷延不退臣阿爾泰回赴雜谷一路調集各土司
諭以合力圍攻並令招致金川以分小金川之勢
提臣董天弼亦抵達木巴宗令小金川速還鄂克
什之地並飭明正木坪各土司分途相機勦撫奏
入

上諭軍機大臣曰據阿爾泰奏查辦小金川與鄂克什
土司構釁意在勦撫並行所辦亦是番夷自相仇殺

其事本不值一辦乃小金川敢於恃強侵佔鄂克什地方督提大員既經親臨查辦自當速令解怨息爭各守境土何得任其頑梗不遵但該督等屢次遣官撫諭僅就兩土司曲直立言番夷無知轉以內地大臣意存偏向欲為和解調停不足以使之輸心畏服莫若傳集小金川土司面為開導諭以爾土司地本彈丸又非險要爾若稍有不馴大兵無難朝發夕至自度力量能與天朝相抗否乎且爾從前

屢被金川欺擾大皇帝憫爾等弱特發大兵征服爾
得保守疆土數十年來安享太平今爾幸無外侮輒
敢自作不靖侵擾鄰封屢經飭諭仍然執迷不悟是
爾全不知感恩安分竟成一冥頑不靈之人設他日
金川復稱兵侵爾疆界肆行吞併爾即窮窘奔愬朝
廷豈尚肯加之憐念為爾維持保護乎爾若逞目前
睚眦之忿不顧將來切膚之患利害得失較然可見
又何所恃以無恐爾當反覆熟思惕然猛省禍福惟

爾自取早自決擇毋貽後悔如此詳切申諭小金川土司自必感發天良帖然服教勝於派兵會勦多矣該督等奉到此旨即遵諭行

八月庚辰阿爾泰奏言臣與提臣先將各處土兵土練分別派撥茲三雜谷土司派兵千名外又續派三百名明正及巴旺土司派兵一千五百名外又續五百名計土練及瓦寺木坪土兵已共派三千名俱赴小金川交界地方屯駐臣等正在督催

進攻該委員轉據木坪等土司稟稱我等分兵前往小金川頗知畏懼已四路發兵防禦若即進攻小金川將以為我等偏向鄂克什非徒慮其心有不甘亦恐驟難搗穴我等願見僧格桑導之退地如再執迷不悞自當併力進攻臣等思小金川此時實有強兵壓境之勢木坪土司欲乘此兵威與之理說如有不遵現在官弁戮力即可督催進勦實屬並行不悖臣等當分飭各員弁相機酌辦奏

八

上諭軍機大臣曰據阿爾泰奏意在撫勦並行亦只可如此辦理但現在所派番兵幾六千餘未免過多番人蠻觸相尋原不足大煩兵力倘集衆合攻或致有名無實更屬不成事體且亦難於完局仍當遵照前旨妥協辦理

甲戌阿爾泰董天弼奏言

臣等遵奉

諭旨令傳集小金川土司面為開導臣阿爾泰於七月

二十日起程自汝川出口由瓦寺赴鄂克什所轄之達木巴宗臣董天弼亦至會同籌辦查達木巴宗距小金川駐扎寨落計有四程隨令宋元俊傳調土司澤旺據澤旺稟稱實因久病不能動履差人投稟請安懇求免罪臣等訪查澤旺久病是實飭令頭人轉傳僧格桑前來諭話嗣據澤旺又稱已傳僧格桑至資哩地方伺候叩見臣等俟曉諭後察其神情辭色再行具奏奏入報

聞

九月丙午

上諭內閣曰阿爾泰著補授大學士仍留辦四川總督
事務

是日阿爾泰董天弼奏言據僧格柔於八月十九
日親來叩見臣等遵奉

上諭剴切開導僧格柔面赤汗流叩頭謝罪據稱我子
子孫孫受

大皇帝厚恩從來安分不敢與鄰封滋事因鄂克什土
司欲以咒詛之術害我父子性命由是發兵攻奪
色達克拉自知理短願將地方給我以為禳解之
資嗣委員至鄂克什官寨色達克拉倚恃委員在
內有思背約調集多人欲與我等決戰我等惟恐
受虧添兵屯駐以為防備並未敢於攻擊今奉面
諭願將所得附近達木巴宗之墨穆爾吉日古嚕
各地方及所搶鄂克什之母舅僧格並番民二十

四名一併交出其鄂克什願給地方仍聽衆土司
調處亦不敢抗違自取罪戾等語臣等察看僧格
桑神氣辭色尚知感激

天恩懼取罪戾其愧悔實出誠心當日即將附近達木
巴宗地方及所搶鄂克什母舅番民一并交出其
鄂克什願給地方臣等未便繩以官兵應聽各土
司自行清理奏入報

聞

壬子阿爾泰董天弼奏言臣等現駐達木巴宗色達克拉病痊來見臣等諭以爾本弱小土司何得以咒詛挑釁自取禍患色達克拉自知錯誤懇求免罪並稱鄂克什官寨被小金川圍攻日久糧食已盡寨落已殘求往達木巴宗以便修理更懇暫留土練數百名協同防守臣等查鄂克什地方本係瘠弱而色達克拉構釁鄰封致其侵害本不足加之愛護且川省沿邊土司其中削弱者不少原

無內地撥兵代防之理但該土司既為內地所轄亦難任鄰境欺凌因暫留把總一員帶兵二十名駐扎達木巴宗又留土練四百名分防各卡俟數月後小金川如果安靜而鄂克什亦稍為整頓陸續撤回至鄂克什番民所種之麥已被蹂躪現在乏食應給口糧籽種使得久長安業奏入報

聞

平定兩金川方畧卷五

欽定四庫全書

史部
平定兩金川方略卷
六至九

員外郎_臣顧宗泰覆勘

總校官原任侍講_臣王燕緒

欽定四庫全書

平定兩金川方略卷六

乾隆三十六年辛卯五月壬戌

上諭內閣曰阿爾泰著入閣辦事其四川總督員缺著
德福補授仍俟德福到川後阿爾泰再行回京

六月戊寅阿爾泰奏言據打箭爐員弁稟稱革布
什咱頭人勾連金川於四月初五日半夜發兵將
革布什咱官寨佔據土司不知下落查其起衅緣由

因革布什咱土司策楞多布丹與郎卡夙有仇隙
凡與金川連界要隘俱設兵嚴守自上年四月郎
卡死後該土司遂無防範且伊待下苛刻頭人等
率多含怨又曾與表妹霍爾章谷之女私通生子
遂與金川之女士婦不和本年正月土婦身故其
土婦所帶頭人心疑土司暗害愈加忿恨適該土
司因病赴熱水塘生湯僅帶二十餘人帳房露處
革布什咱頭人遂乘隙勾連郎卡之幼子索諾木

乘夜發兵據其寨落擾攘之中該土司是否被戕
尚無確信應請酌派漢土官兵速往彈壓查辦等
語_臣等查策楞多布丹疎於防敵以致屬番內之
變勾結強隣猝佔其地禍固由於自取而索諾木
罔識利害因其頑劣頭人慫恿遂將革布什咱地
方全佔若不稍示兵威或漸波及明正地方則於
內地有關當令宋元俊先往嚴加曉諭並飭調兵
練三千餘名派往分布使金川有所畏懼始可相

機驅逐如果該土司實已被戕身故亦當查追兇
審正法並於革布什咱宗派中擇其番衆悅服者
奏明請

旨承襲以統屬番_臣等亦隨親往督辦俟察看情形另
行具奏奏入

上諭軍機大臣曰金川索諾木幼小罔知利害而革布
什咱頭人又復頑劣不法攝以兵威自不可少阿爾
泰等一聞員弁等稟報即調兵練前往分布防查並

先後親往確勘情形相機辦理頗為妥速協宜即摺
內所稱俟收復故土後擇該土司支派中衆所悅服
者立為土司亦必應如此措置惟追查兇番正法一
節此時尚宜姑緩該頭人敢於勾引金川佔據其地
戕害土司其情固為可惡但現在金川番衆分據寨
落搶攘未寧若速于窮治罪人持之過急恐其聞風
畏懼鋌而走險更與金川固結猝難解散阿爾泰等
至彼惟當遣人宣諭金川以郎卡自經懲創以來承

受天朝撫輯深恩尚為恭順今索諾木父故未久輒擅發兵襲佔隣地實為非理第念索諾木年幼無知且受人慫恿姑從原恕特遣員明白曉諭速將土兵全數撤回仍還革布什咱土地本閣部亦不復加深究使其曉然于恩威禍福自當斂衆歸巢阿爾泰等便可撫定其地擇立革布什咱宗派承襲土司俟一切寧貼後從容跟究兌番按法處治亦不致慮其漏網如此辦理于事機較有次第不致張皇雖明正土

司稍有驚慌情形而現有兵練在彼彈壓自足以安
其心阿爾泰等務須鎮靜查辦行所無事方為合宜
甲申阿爾泰董天弼奏言臣等于五月初八十一
等日先後自省起程途次清溪據宋元俊等稟稱
革布什咱逃出小頭人旺勒丹據稱四月初五日
該頭人跟隨革布什咱土司赴黨哩熱水坐湯共
帶三十餘人半夜在帳房中忽聞鎗聲亂響已將
帳房圍住刀鎗亂下我衝出逃走土司已被殺害

我不敢回家由山嶺樹林內繞路行走要報父母
官作主等語隨將該蕃送交打箭爐同知安插二
十一日馳至革布什咱連界之章谷地方差人嚴
飭索諾木數其佔奪鄰封戕害土司之罪令其呈
繳印信尚未據索諾木稟覆現在參將鄭國卿將
明正木坪土兵調齊于喀勒塔爾章谷兩路分守
金川見兼有漢兵在內將所駐附近明正之兵稍
為退後其德爾格忒土司亦差頭目稟稱金川將

革布什咱土司戕害並據其地我等土司均屬寒
心欲將革布什咱地方奪回再內地揀選應襲之
人襲職我等方可安心等語臣等查金川敢于乘
革布什咱頭人內變互相勾結全佔其地戕害土
司自應嚴加懲創方不致吞併弱小並波及明正
地方今據德爾格忒土司等具稟正可趁伊等義
憤所激聽其以番攻番惟是各該土司相距革布
什咱寫遠調集土兵尚需時日臣等當令宗元俊

宣布

皇上德威數其罪戾曉以禍福利害嚴切譯諭並飭調該土舍前來進見如索諾木深知罪戾退地獻兇德爾格忒等土兵即可止而不用如其執迷不悟即聽各土司併力攻奪以昭懲創奏入報

聞

甲午阿爾泰董天弼奏言據宗元俊稟稱遊擊前經曉諭索諾木茲據覆稱革布什咱土司因欲害

其叔敦珠布汪扎爾其叔來求救援是以發兵前往至殺死革布什咱土司即係正地之人並非我等戕害懇將革布什咱百姓賞給當差等語又據革布什咱之瓦述頭人密稟稱我等均被金川挾制實非本願惟求內地救援即當投歸等語遊擊審察金川稟覆情詞已不肯遽還革布什咱之地而瓦述頭人密稟又似機會可乘若用土兵攻其外又有該處番人應其內金川番衆自必潰散如

其得進固可長驅直入如不得進且將革布什咱地方之附近明正者先為收復再行籌辦等語

臣

等查革布什咱頭人內變是以金川一旦遽佔其地今瓦述頭人所稟虛實尚未可知因飭該遊擊細加體察籌度萬全勿輕舉動再明正土司地方既有兵練彈壓臣等駐札該地各番悉皆安堵無虞奏入

上諭軍機大臣曰阿爾泰等奏索諾木懇將革布什咱

地方百姓賞給當差此事斷不可行前因革布什咱頭人內變勾結金川佔據其地阿爾泰等已親往督辦因令遣員宣諭使其曉然于恩威禍福之分如索諾木速將土兵撤回還其土地歛衆歸巢原可就事完結不加深究今索諾木乃請將革布什咱之百姓賞給當差顯係覬覦土境妄思佔據自斷不可稍涉遷就至革布什咱土司雖已被害仍須如前奏所云擇其近支衆所悅服者立為土司豈有歸併金川之

理阿爾泰若稍露隨便完結之意使彼得逞其欲勢必于附近土司漸圖蠶食又復何所底止正不可不防其漸此時若過涉張皇遽加兵力固非所宜若一味姑息游移急圖了事于邊境大有關碍着傳諭阿爾泰等務須斟酌機宜以期經久無弊方為妥善仍將索諾木于奉到傳諭後情形若何迅速奏聞

七月甲辰阿爾泰董天弼奏言臣等現駐打箭爐

據雅州知府江權稟稱六月初十日木坪土司送

到鄂克什審民雅瑪塔克結二人據供小金川又復發兵將鄂克什達木巴宗木耳宗資哩一帶圍困我兩人於夜間逃出要往維州具報路阻不通所以逃至木坪又據瓦寺土司報稱小金川番衆圍困鄂克什一帶並將瓦寺之巴朗拉佔據等語

臣等查小金川上年圍攻鄂克什經臣等親往傳集僧格桑面為訓飭該土舍已畏服輸誠詎為日無幾忽復發兵侵擾凶頑已極且金川戕殺革布

什咱土司之事未完而小金川之兵又動如此跋
扈難以理喻且鄂克什土司上年因地小力單尚
須協助現留把摠帶同兵練在彼駐防乃小金川
悍然不顧即行攻擊若不痛加勦殺將來互相攻
奪勢且歲無寧日寔與邊境有關臣等再四熟籌
土司中如瓦寺木坪人少兵單僅堪自守而三雜
谷土兵亦為軟弱至土練止有數百名尚非小金
川勁敵以之救援鄂克什恐難取勝不得不臨以

內地兵威設法掩殺以挫其氣臣等現調省標及
松維等營官兵三千名預備臣董天弼即于十五
日從打箭爐馳赴西路相機查辦臣阿爾泰仍駐
南路籌辦革布什咱事宜奏入

上諭軍機大臣曰阿爾泰等奏小金川圍攻鄂克什請
臨以兵威所見甚是番夷自相仇殺雖屬常情但小
金川去歲與鄂克什構衅佔據其地經阿爾泰等親
往飭諭業已遵奉退還乃為日無幾復敢稱兵侵擾

似此怙惡不悛非復可以理喻且現在金川與革布
什咱之事尚未辦完而小金川又復効尤滋事此而
不加以懲創伊等將視內地大臣專務調停和事不
復知所畏忌于撫馭番夷之道甚有關係今董天弼
既親往該處甚為合宜竟當統兵直搗其巢穴或以
計誘或以力取將僧格桑擒解省城候旨另擇馴謹
奉法之人立為土司安撫其地方為妥協若僧格桑
聞董天弼親至其地仍來求見即設法誘擒亦無不

可斷不宜仍以和解了事庶徼外頑番稍知儆惕且可使金川聞風震懾斂跡歸巢自為一舉兩得將此傳諭阿爾泰董天弼知之

臣等謹按金川頑梗不馴自十三年赦罪之後侵擾鄰封已非一次第究未嘗侵軼內地是以節奉

諭旨惟令以番攻番並不稍煩內地兵力至僧格桑于三十五年尋衅攻圍鄂克什經封圻大吏親往

飭諭撤兵甫及決歲蠢動如前是雖未經侵軼
內地顯已違犯約束况索諾木于四月初旬併
吞革布什咱而僧格桑即于六月之初相因而
起其為互相狼狽又屬顯然此時即將兩金川
一併勦除亦所應得乃伏讀

諭旨惟令先辦小金川使金川聞風震懾自為一舉兩
得仰惟

聖意總不欲以小醜跳梁大興師旅及至索諾木助兇

黨逆怙惡不悛乃始聲罪致討必期盡滅蓋我
皇上慎重佳兵之意固為天下臣民所共見而于仁育
義正隨時因應之理權衡悉協又非尋常所能
測識也

戊午阿爾泰奏言七月初三日據明正土司甲爾
參得沁稟稱僧格桑係與土司郎舅土司河西納
頂等處寨落插在小金川界內向來相安無事因
僧格桑發兵圍攻鄂克什土司屢經勸戒藥石成

仇現在納頂等處土兵俱赴革布什咱防守小金川乘隙發兵將納頂等寨佔據等語臣查小金川已圍鄂克什乃復侵及明正地方殊為跋扈本宜即加攻勦但明正番民孱弱若內地遽為添兵攻奪不惟事涉張皇而革布什咱之事未完鄂克什之圍未解四面疲我兵力亦為非計隨加嚴飭曉以利害禍福且令明正土司於要隘多撥土兵防守並將所調漢土兵練酌撥協防無任滋蔓計提

臣此時已到鄂克什所調兵練諒亦陸續到齊或
小金川見官兵進發尚知畏惧斂兵則鄂克什可
保而明正地方亦必退還如其敢于抗拒勢須用
兵襲擊臣亦于南路用兵夾攻使其首尾受創奏
入

上諭軍機大臣曰小金川復侵明正土司各寨阿爾泰
等斷不可稍存姑息前據奏到小金川攻圍鄂克什
董天弼親往查辦已諭就近進兵務擒僧格桑另立

土司撫定其地今鄂克什之事未完又敢于侵及明
正若不懾以兵威大示懲創番夷豈復知所畏懼阿
爾泰欲于南路酌用兵力夾攻使之首尾受創所見
甚是但慮及疲我兵練之力尚未免猶存姑息之見
未為得要小金川錯居土司之間地方本非寬廣况
昔年進兵金川時曾經其地是我兵長驅直入不致
或虞艱阻若云兩路攻勦土練或有不敷何妨于成
都調滿洲兵一千令鐵保帶領前往兼于綠營內選

派精銳數千統以勇幹將領合之土練約足五千名
辦此自屬易事摠宜搗其巢穴務獲兇渠仍遵前旨
或以力擒或以計誘臨時酌量妥協切不可因其窘
急求宥輒事調停完局致養癰貽患也再現在金川
侵佔革布什咱尚未退兵倘僧格桑因我兵夾擊力
威勢窮聯絡金川恐致蔓延難制阿爾泰等酌量彼
處情形若能斷其與金川往來之路一面用兵勦擒
自更無虞免脫設計其去路不能斷截則莫若諭令

金川如能縱掠小金川所得財物即以賚之惟地方仍還內地彼若擒其土舍亦即解獻受賞番夷貪利自必踴躍從事我既兩面夾攻復添此一層掩襲僧格桑更無可逃亦合以番攻番之法阿爾泰等務須實力妥辦切勿稍涉游移將此并諭董天弼知之

壬戌阿爾泰奏言查金川與小金川後先起衅顯係朋比為奸若一併動用兵力需兵既多糜費愈重臣等詳慎籌度將革布什咱案內所謂之兵揀

派四千餘名酌撥明正要隘防禦倘小金川再敢肆擾臣即相機辦理至金川索諾木欲差其頭人稟話臣已令宋元俊前往宣諭如果遵從則小金川之業亦可酌辦倘索諾木執迷不悟臣亦不敢稍事姑息任其肆為吞併奏入

上諭軍機大臣曰小金川因金川與革布什咱相仇敢于效尤滋事其情甚為可惡就兩處情形而論亦判然不同朕意宜先辦小金川擒其克渠治以重罪則

金川自當聞風畏懼歛跡歸巢斯為一舉兩得阿爾
泰何竟見不及此且前此進勦金川至今不過二十
餘年從前隨征弁兵必有存者小金川路程自所熟
識即可用為嚮導更無難于深入若籌及兵力或有
不敷則檄調滿漢官兵土練約足五千人並非難事
前降諭旨甚明此外復何顧慮至阿爾泰督兵攻勦
原非所長但將領中豈無勇敢明習堪以帶兵阿爾
泰第須就近隨時調度示以機宜更不得諉為力所

不給此時自宜速與董天弼商酌尅期兩路夾攻勦擒僧格桑相機而行務在必得此事方能完局豈可稍涉游移耶阿爾泰初奏以僧格桑非可復以口舌化導令董天弼前往西路酌量進兵頗為有見及前次所奏却有恐四面疲我兵練復為曉以利害禍福之語意已猶豫不及初念之堅今乃云酌撥兵練防禦明正要隘倘再肆滋擾一面相機辦理等語更屬非是試思僧格桑去歲甫受約束曾未逾年復攻圍

鄂克什且又侵及明正土司即宜興師問罪以儆克
頑尚何所用其遲疑緩待必欲縱令鴟張坐貽養癰
之患耶阿爾泰久任封疆不應不曉事若此至金川
形勢險隘非小金川可比原不便輕率用兵且果能
將小金川迅速嚴辦示之炯戒則索諾木自當聞風
知畏不待勦而自退何至慮及一併用兵需兵多而
糜費重阿爾泰豈全未審度事理重輕惟急于完事
卸責乎阿爾泰著傳旨嚴行申飭至董天弼自往西

路以來為時已久於何時進兵及僧格桑曾擒獲否
至今未據奏及亦諭令迅速奏聞仍與阿爾泰聲息
時通協力妥辦

癸亥

上諭軍機大臣曰小金川僧格桑與鄂克什構衅且敢
侵及明正土司董天弼既馳往西路進兵阿爾泰即
當會兵夾擊出其不意執彼克渠則金川聞而知畏
自當不待征勦斂迹歸巢阿爾泰遷延不決辦理已

覺遲滯若再因循時日致其潛相聯絡滋蔓難圖於
邊務甚有關係德福已調任四川總督伊曾在阿克
蘇等處辦事於調度軍務亦所諳悉而阿爾泰係多
年總督且已授為大學士其責亦無可諉兩人妥辦
籌商自能和衷集事德福想已自永昌起程途中接
奉此旨即由該處取道四川往打箭爐一帶會同阿
爾泰商辦

八月丙子

上諭軍機大臣曰小金川與鄂克什構衅一事阿爾泰中無定見恐其因循貽悞業諭德福迅速赴川與之會商妥辦並諭鐵保帶領成都滿洲兵二百名前往備用德福到後鐵保等如已統兵至彼而綠旗精銳亦經調集軍務易藏自無庸再為籌畫若不能尅期集事轉不必急于用兵溫福現在永昌籌辦秋冬襲擊緬匪之舉其事易于就緒若屆時小金川尚未辦竣自不得不厚集兵力一舉蕩平溫福回至永昌即

統現有滿洲勁旅並選派出力黔兵數千名就近星馳赴川約計二三月可到著傳諭溫福預為籌度並令德福將該處情形隨時馳寄溫福俾得留心部署同日阿爾泰奏言近接董天弼來札稱伊到瓦寺之卧龍關小金川已于各路添修碉卡據守惟時官兵尚未到時是以先行譯諭曉以利害臣已令其迅速探明進兵路徑相機妥辦第小金川現在所據鄂克什之地距其巢穴尚有四五日路程須

擊退攻圍鄂克什之兵然後可以直抵小金川邊
界計不無稍需時日而兵力應否酌增現與提臣
商辦至索諾木求宗元俊親臨其地面聆分付經
該遊擊請示前來臣亦令其迅速前往飭索諾木
退地撤兵不得稍存遷就此次調用官兵既為日
亦不無稍久倘餘茶息銀不敷支用請酌動司庫
存項以資經費奏入

上諭軍機大臣曰小金川必當進兵不待再計而決阿

爾泰既往查辦且令董天弼馳赴西路用兵自應乘其不備星速進剿乃徒虛張聲勢使僧格桑得以修卡預防已屬濡遲悞事乃猶以官兵尚未到齊為辭惟思文告彌縫益令番夷輕視似此措置乖方豈能望其有濟至進剿漢土兵練或有不敷即當早為籌撥如成都滿兵川省綠營皆可酌量調派阿爾泰既不能預籌及此轉以兵力應否增添商之提臣酌辦尤為可笑督臣統轄全省兵務即提督亦聽其節制

有何顧慮而以添兵之事委之提臣致往返遷延乎
又所稱餘茶息銀不敷支用更為不曉事體既遇此
等夷疆要務即當通盤籌畫裕餉濟師朕于各省軍
民要務即所費較多從不稍為靳惜亦並未嘗以此
加罪于人阿爾泰身為大臣寧不知之不宜識見卑
鄙至此著傳諭嚴行申飭至宋元俊既經總督派往
曉諭且索諾木又懇親臨其地即應前往何必具稟
請示久延時日明係該遊擊憚于此行故為迂迴脫

卸之計甚屬退縮不堪並著阿爾泰查明叅奏

己卯董天弼奏言臣于六月十五日自打箭爐起

程即知會松潘鎮總兵福昌先將調集松潘維州官兵于各路隘口督同土兵分布防禦七月初二日抵瓦寺之卧龍關計與小金川現佔之巴朗拉相距八十餘里賊人已于山頂砌礮修卡為久守之計而鄂克什之達木巴宗木耳宗日隆宗係在巴朗拉之西南小金川既據巴朗拉是將官兵進

援之路隔斷以圖吞佔臣約計達木巴宗所貯糧
米足供園中番民官兵數月之用尚無慮其匱乏
難支現在先諭小金川曉以禍福利害如果執迷
不悟俟所調官兵到齊乘隙掩襲並已令鄂克什
逃出之能事頭人潛赴達木巴宗密通信息以便
內外夾攻奏入

上諭軍機大臣曰董天弼于七月初二日已抵卧龍關
至初六日尚爾茫無措置豈兵貴神速之道且董天

弼身為提督川省兵丁皆其所轄何難飛檄催調迅
速掩擊使彼猝不及防乃遷延坐待意存推諉何以
膺專閫重寄著傳旨嚴行申飭嗣後宜自奮勉痛改
毋貽重戾

平定兩金川方畧卷六

欽定四庫全書

平定兩金川方略卷七

八月壬午董天弼奏言臣查巴朗拉為鄂克什瓦

寺交界之處山梁險峻若遽用力仰攻賊人加意

防守未免稍延時日惟距卧龍關四十餘里山神

溝地方別有小路可以繞出巴朗拉之後由此潛

進則小金川已失其險並與達木巴宗聲勢可以

接連臣先已遣人偵探茲據探路人回稱達木巴

宗賊番約有二千圍困攻擊鄂克什土司尚能堅
守而由山神溝前往五日可到沿途雖有賊衆為
數無多臣定於本月初七日進發其巴朗拉山下
鄧仍地方仍令總兵福昌領兵誘敵相機攻殺奏
入

上諭曰既得捷徑視汝如何奮勇成績耳

甲申阿爾泰奏言查明正地方現在漢土兵練五
千五百餘名除明正之泰寧茂紐東谷章谷郭宗

等處要隘防守用兵二千名外尚有兵練三千數
百名似可敷用但小金川與明正交界隔有大河
須用皮船過渡而皮船每隻僅容載一二人且小
金川沿河設備不能徑渡是以趕造木船並設法
遮護賊人鎗砲使兵練得以多渡奮力攻取至僧
格桑與索諾木本係同族弟兄又係姻親地界毗
連實不能斷其來往再小金川近復于木坪連界
地方添設碉卡以禦我兵進攻之路臣等已撥兵

防禦奏入

上諭軍機大臣曰據阿爾泰奏籌辦小金川一摺總不
中機宜不見奮勇已於摺內批飭矣看來阿爾泰辦
此一事始終茫無定見前奏令董天弼馳往西路示
以兵威不過空言塞責其實並未預計進兵及見朕
屢次飭諭方知事難中止而所辦又已濡遲故其前
則徒以官兵未到為辭今復以隔河艱渡為解可見
其始則惟圖遷就完事意涉游移今則氣餒心粗畏

難自阻尚安望其能奮勵集事乎阿爾泰駐彼已將
三月果知必須舟楫即當上緊製備船筏剋日濟師
何待至今始行成造且復慮及賊人鎗砲設法護船
作此畏葸無能之態耶至小金川敢於設碉預防顯
拒官兵則其與金川早相聯絡可知若復日久因循
益滋養癰之患乃惟以不能斷其往來藉口豈因僧
格桑有金川黨助竟欲置之不問乎且小金川設碉
拒防我兵何難超越別尋進路阿爾泰何未聞購覓

捷徑率衆進攻而存守株坐待之見乎即或因伊等
虛張聲勢曠空時日致狡首得以預為之備一時未
可猝議進勦獨不當多調兵練為圍困計竟爾束手
無策耶且番夷全賴耕種為食必不能終年防守自
棄農功更不能築碉護田廣為守助或察其懈而急
為襲擊或就其地而頻加蹂躪使之應接不暇久將
自潰乃阿爾泰畏首畏尾於近計遠籌漫無措置所
謂公忠體國之意安在著再傳旨嚴行申飭

臣等謹案番地重山疊嶂其陡險盤曲處實有
一夫當關萬人莫開之勢况賊人築卡設碉併
力拒守更不能遽入其阻惟別尋路途繞越進
攻始為因地制勝之算嗣後大軍申討金川往
徃乘間擣虛出其不意是以賊人雖有要隘可
憑亦皆棄而不守盖得力于繞越者居多而是
時

諭旨早發其端仰見

先幾所燭片言居要不待聚米成圖而番境情形已均
在指顧間矣

丁亥董天弼奏言臣定期進攻各兵已陸續齊集
將足五千可敷調遣除酌派福昌帶赴巴朗拉並
查鄂克什之畢旺拉一路亦須分往堵截及留護
糧運共二千餘名外其餘各兵裹帶乾糧於初七
日由山神溝密往掩襲並據督臣阿爾泰知會現
已趕造皮船渡河勦殺小金川當此兩路夾攻首

尾不能相顧勢必解去鄂克什之圍退守巢穴至
該處路徑臣曾於乾隆十三年隨征經過猶能記
悉所有木坪之甲金達襍谷之曾頭溝各路皆可
進兵臣帶兵前進容隨時辦理具奏奏入

上諭軍機大臣曰據董天弼奏已於八月初七日督兵
由山神溝密往掩襲自應如此辦理但所稱小金川
首尾不能相顧勢必解去鄂克什之圍退守巢穴等
語尚有急圖完事之意僧格桑乘隙滋釁不可不與

師問罪並非專為鄂克什解圍恐伊等尚狃於姑息之見一聞僧格桑解兵歸巢苟幸無事不復擒捕渠魁仍思將就完局番夷豈復知所警畏即或暫時歛迹待官兵既撤彼復侵擾鄰疆又將另為整理往返徒勞成何事體總之僧格桑一日不擒其事一日不了董天弼既經進兵必須相機制勝將僧格桑俘獲以靖蠻貊至董天弼已得間道進攻而阿爾泰株守河干坐待船成方渡所謂夾擊之義安在據董天弼

奏木坪之甲金達襍谷之曾頭溝各路皆可分進阿爾泰於此等扼要捷徑自應預為確訪密派勇練將領統兵分路掩襲使番首四面受敵首尾不能相顧方為勝算徒爾優游時日漫無措施則在彼閒住數月所辦何事乎將此並諭阿爾泰德福董天弼知之

甲午阿爾泰奏言臣南路造船因物料匠工均須自內地發往現在日夜趕辦約計十四五日造成我兵即可渡河奮擊至革布什咱一事前令宋元

俊面見索諾木飭令撤兵退地索諾木以伊弟兄
五人分住勒烏圍等處容商明再稟為辭該遊擊
見索諾木難以化誨已於八月初六日馳回並稱
小金川道路叢穰進攻以後遇有歧途勢須分兵
攻取臣亦飭各營預備以資應用至小金川之肆
橫較金川尤為可惡臣飭令宋元俊駕馭索諾木
抄掠小金川寨落如能擒獻僧格桑更有重賞再
宋元俊于邊地道路情形頗為熟悉副都統鐵保

未到之前即令該遊擊統兵渡河攻勦奏入

上諭軍機大臣曰阿爾泰奏宋元俊往諭索諾木據伊以弟兄五人商明再覆為辭顯係推阻之意看來索諾木之頑劣不遵總因僧格桑甫受約束旋與鄂克什搆讐又復侵及明正土司尚未加之懲創遂致無所忌憚今惟將小金川上緊攻勦擒獲克渠削平其地則金川自必聞風畏懼不敢復行梗化辦理之法無有踰于此者昨據董天弼奏已於八月初七日由

間道進攻阿爾泰亦稱約計十四五日即可進兵果能刻期夾擊或僧格桑勢窘力感竄入金川亦不值引兵復向金川勒取止須查其家屬及黨惡之人分別收捕查辦一面傳諭索諾木令將僧格桑擒獻其事亦可即了至前諭令索諾木抄掠小金川彼時因未知伊等已經聯絡今就該處情形而論則伊等久相比附狼狽為奸索諾木豈復肯於小金川自相殘賊乃阿爾泰仍以駕馭索諾木抄掠為言可為拘泥

而不達事體現在專辦小金川不必復向金川告諭
若僧格桑或向金川逃匿則於傳檄索取時并諭以
僧格桑自作不靖竄入爾界令官兵已平定其地留
兵駐守是僧格桑永遠不能歸巢爾令留彼養贍其
衆何時能了是爾無端為彼貽累亦殊失計爾若能
將僧格桑獻出自當將爾獎賞番蠻等本屬見小為
之明白開導其勢不能久合如此方得要領

丁酉

上諭軍機大臣曰德福至四川所陳緬賊各情形一摺
識見寔為乖謬緬地水土惡劣戎兵難於深入自不
宜復議大舉墮其術中而賊匪反為頑梗亦豈可竟
置之不問因議於秋冬之間派兵襲擊出其不意並
非欲直搗阿瓦亦非欲竟取猛密不過躡彼疆境乘
勢誅掠焚燒令賊匪知我並未歇手庶幾稍識畏懼
送還內地之人以完此局就事而論實有不可不如
此辦理者何至過於顧慮襲擊亦不可行即前諭德

福到川即接受總督印務辦理小金川軍務若執此懦怯庸謬之見恐其於進勦事宜轉致貽誤所有四川總督印務仍著阿爾泰兼管德福即著來京候旨

九月庚子阿爾泰奏言臣前令宋元俊駕馭金川

抄掠小金川寨落嗣據宋元俊稟稱金川距章谷稍遠且夙與小金川姻親相好是否實心出力難以預定查有附近章谷之已旺及布拉克底夙稱恭順該土司之地與小金川所佔明正之納頂等

處境界毗連若於該處進兵攻克納頂等處由納頂壓至河之東岸攻打小金川所佔明正之索布大寨又分一支渡河夾攻則所佔明正地方可以全行克復進勦巢穴庶易為力隨委員密飭該土司土舍令其遵辦嗣據稟覆該兩處願出兵一千五百名先為引路並請大兵接續進發惟是土兵即係土民散處四鄉現在分頭調集揀選精銳整頓器械趕緊進攻等語查此時小金川止防我兵

渡河若用布拉克底及已旺之兵協同大兵由該
處進兵出其不意尤易制勝是以十五六日未即
渡河攻勦等語臣隨諭宋元俊速即訂期並進毋
得遲悞至董天弼一路先訂期於八月初七日發
兵由小路密進截斷小金川圍鄂克什之路計須
五六日方可抵松林口據其險要近據西路糧員
稟報探得我兵於八月十三日攻獲大碉一座已
經佔據山梁再查副都統鐵保帶兵二百已抵打

金史紀事本末卷之六十五 卷之六十五
箭爐計二十間滿兵可以到齊俟到日親往督催
進取奏入報

聞

辛丑董天弼奏言臣與福昌於八月初七日分路

進兵臣由山神溝密進初十日至德爾密地方始

遇金川番人設有石卡碉房在彼防守臣即于十

一日戌刻發兵分為三路前往攻襲十二日平明

連奪石碉六處石牆一道惟石碉一座建在山頂

至十三日臣督領官兵一齊鼓勇直上攻破石礮
金川番衆被殺者數十人其餘均從後山越嶺而
逃吾兵亦有損傷現在已扼山梁險要因該處雨
雪交加各兵均係裹帶乾糧不舉煙火者八日未
免稍形瘦乏現俟畢旺拉一路探有消息兩路會
合即當併力進攻至巴朗拉之下鄧仍地方即係
山神溝後路極為緊要臣已照會福昌加意守禦
並飛移督臣阿爾泰以便各路分兵掩殺使僧格

桑顧此失彼速期勦滅奏入報

聞

上諭軍機大臣曰董天弼辦理此事尚屬奮勉但該提督雖係由間道往攻裹糧而行豈無繼運兵餉俾資接濟亦豈無續到之兵以為聲援阿爾泰初聞董天弼進攻之信曾否籌辦及此迨探知董天弼攻碉之後曾否速為策應著傳諭阿爾泰即行據實覆奏至巴朗拉一面為攻小金川大路董天弼原議令總兵

福昌帶兵進勦以挫其鋒彼由小路密進兩路夾擊
今董天弼進兵後已克卡礪而福昌自八月初七日
分兵以來至今已將一月曾否進兵攻勦及巴朗拉
一路有無賊匪拒守該鎮曾否與之接仗所辦情形
未據奏報總兵本有奏事之責况當統兵分勦尤應
隨時入告豈宜緘默若此著傳諭福昌令其迅速詳
悉覆奏

乙巳溫福奏言臣接奉辦理兩金川

諭旨今于明春帶兵馳赴進剿伏查滇省今冬襲擊緬
匪一事約計往返亦須數十日回抵永昌已屆臘
盡春初臣于彼時帶兵馳往川省自不悞二三月
之期惟查滇省所調綠營兵丁只有二千七百名
分駐沿邊尚恐不敷應於黔兵內酌留協駐且查
黔兵額設三萬餘名此次調起來滇者不過上游
各營三千名既經進剿撤回復自永昌赴川路程
轉為遙遠查貴州下游一帶多與川省毗連設如

必用黔兵莫若於下游各營酌量調撥計臣由滇
起身時黔兵先由該處赴川道里既近行走迅速
其一切料理較之自滇調往並無多費而新兵更
為得力臣當密為審度不涉聲張臨時請

旨辦理奏入報

聞

戊申董天弼奏言據守備袁國璉稟稱帶領屯兵
七百名漢兵二百餘名于八月十六日夜進至畢

旺拉同時奮力攻殺已將小金川殺死多人石卡
碉房全已據住但該處小金川來路甚多現兵不
足防守應請添兵等語臣因所帶漢土官兵五千
除挑去病兵二百餘名又于卧龍關內留兵三百
名防守糧務鎮臣福昌處復留兵一千三百名為
巴朗拉誘敵及防守山神溝口之用其由山神溝
口進去額隆覺地方斜通巴朗拉留兵五百名防
守皆係緊要一時無可抽調至臣所統兵一千五

百餘名于山頂碉卡留兵四百名防守其一千一
百餘名在山下割管接應臣于二十二日即撥在
營屯鍊四百名遣往畢旺拉詎意賊番乘霧雨迷
漫之時於左右兩山梁蜂屯蟻聚而來守碉之瓦
寺土兵先行驚潰屯鍊官兵亦相繼下山雖損傷
不過十餘人并仍將要口堅守而所得之碉卡復
行失去至二十六日接到表國璉具稟知畢旺拉
亦先于二十日夜為賊番奪去官兵退守山下伏

念臣種種負戾即自問亦無可定仰懇

皇上交部治罪不勝悚惕之至奏入

上諭軍機大臣曰據董天弼奏所得碉卡復已失去其
畢旺拉一路亦為賊番奪去現在退兵堅守要口是
賊番竟敢抗拒我師甚為可惡豈可輕為歇手至董
天弼所請交部治罪之處且可不必得失乃行兵之
常董天弼前次進兵不敷調撥綠營積習又皆懦怯
無能阿爾泰復不早為籌撥接應以至於此且看其

後此如何奮勉以定功罪若再不知努力則其獲罪更甚矣但所稱賊兵乘霧雨迷漫蜂屯蟻聚而至守碉之瓦寺土兵輒先驚潰等語殊覺可笑賊既能乘霧來攻我兵豈不能乘霧迎勦是兵力不堪大概可知且瓦寺與小金川同係土司何以賊之土兵皆屬有用官之土兵即屬無能此皆調度不善之故阿爾泰在川甚久豈竟漫無見聞何以不詳慎精選聽以懦弱充數著傳諭阿爾泰明白回奏至董天弼本係

乘間攻其不備令德爾密一帶既有賊兵屯拒自難
仍由原路再進亦不必復攻所失之碉萬一少有挫
折更覺不成事體但我兵即不能深入而守禦隘口
尚屬力所能為自當派撥兵弁嚴為堵截西路現有
福昌在巴朗拉駐守則山神溝畢旺拉兩處即可交
該鎮一并抵禦以綴賊勢董天弼於番地情形稍為
諳悉且曾從征金川尚係熟手今阿爾泰坐守南路
無協同辦理之人董天弼著即馳往阿爾泰軍營會

商進勦或可得其攸助之益惟是綠旗恇怯之兵實
不足恃看來未必遽能集事第當圍困賊人要隘以
待厚集兵力搥穴擒渠用靖邊徼前曾諭令溫福襲
擊緬匪一事原不過蹂其近邊恚力焚殺以振兵威
即遲一年再辦亦無不可況既欲用我八旗勁旅之
力若令於襲擊後再往四川長途奔走或不免於疲
乏亦不可不從長籌畫以期有濟溫福前奏原議於
十月初進兵此時尚在永昌部署著傳諭溫福於奉

到此旨後即帶滿洲官兵星馳取道赴川奮力攻勦使番人稍知畏懼其黔省綠營兵即照溫福前奏酌定應用兵數飛咨黔省於川省相近營分選派精兵即速前往自覺更為妥便所有副將軍印務溫福即帶往備用至叅贊大臣五岱於軍務頗為練習亦著同溫福前往會商進勦阿桂亦著赴川効力其川省綠營兵即多為調撥亦未必能得力並著派成都滿洲兵一千名速赴軍營聽候派用其各兵所需馬匹

糧餉著交阿爾泰預為熟籌速備

己酉

上諭內閣曰戶部侍郎桂林著馳駟前往四川辦事其軍機處行走郎中汪承霈亦著一體馳駟隨往

同日

上諭軍機大臣曰阿爾泰等畏難苟安全無措置及朕屢次飭責始行籌及遂致兵不敷派糧無繼供此董天弼一路所以雖由間道進攻而復失也今小金川

竟敢抗拒我兵尤不可以輕宥無如阿爾泰始終毫無成見於需兵若干作何調撥及何路可以進擊何路當為堵截並未通盤籌畫不過敷衍目前似此玩忽遷延必致養癰貽患是以令溫福馳往督辦但溫福自滇赴川未能一時即至因令桂林前往協同辦理桂林在軍機處行走於朕前後所降之旨皆面聆深悉至彼自可詳悉告知阿爾泰阿爾泰惟當與之和衷商辦不得稍存畛域之見致令掣肘亦不可稍

有推諉之心且桂林此次派往因其年富力強尚可奮勉以助阿爾泰所不及阿爾泰若以外省積習妄為揣度疑朕專差大臣往彼密查其事則更不能深體朕意矣至於行軍要務該處山川形勢及統兵所在地方並軍營現兵幾何皆當繪圖陳奏朕得以遙為籌度乃阿爾泰從未辦及著即將小金川一帶毗連境壤及我兵進攻要隘詳繪一圖注明名目所有董天弼前在何處進兵福昌今駐何處宋元俊現住

金史紀事本末卷之七
卷之七
何處及阿爾泰久駐之地近日前進幾程逐一貼於圖
內並將現在軍營實有綠營若干名一併具摺速奏
至溫福到川進勦時約需精兵萬餘方成聲勢阿爾
泰此時當預為籌撥除溫福所帶八旗兵及黔兵三
千餘名并成都滿洲一千名尚需兵若干就川省各
營內慎選勇敢精銳之兵足敷備用所有進兵時馬
匹糧餉火藥鉛丸皆係緊要之事不可不早為籌備
充裕阿爾泰務須實力妥辦若於此尚不盡心臨時

稍有貽誤則是自速罪戾矣再溫福前奏請于貴州
下游與川省毗連各營酌量調撥此係就從前情形
籌畫今既不辦襲擊則黔兵並不疲勞而分駐沿邊
尚有滇省現調之兵可派所留黔兵亦屬無多溫福
即當選擇勇銳者二千餘帶往其不敷之數再飛咨
黔省於下游近川一帶揀選精兵如數調用派將領
等星馳帶赴川省軍營聽候分撥至所留在滇之侍
衛章京等自當令其巡防要隘今復派海蘭察哈國

興在滇伊等但能用心協力諸事自為周密

庚戌阿爾泰德福奏言九月初一日據宋元俊稟稱遊擊約定巴旺布拉克底土司於八月二十七日分路進兵叅將薛琮鄭國卿等帶領綠營土練並巴旺布拉克底土兵暗上山梁遊擊與都司李天佑等帶領兵練渡河夾攻官兵奮力攻打奪獲石卡十八座殲斃賊番二十餘人生擒四十餘人墮崖落水者不計其數薛琮等所領兵練從山梁

往下夾攻兩路會合收復小金川所佔之納頂邊
谷碉寨一百五十餘所已得河西險要一面分兵
進攻小金川之約咱一面攻取小金川所佔之仲
濃等語臣等查南路之難於進攻者因小金川已
據明正土司之險是以稍覺濡遲今已渡河可抵
小金川邊界又加西路夾攻必難支抵但從此逐
日前進所有分守已復地方及安設臺站護送糧
米火藥等項在在需兵是以催調建昌鎮標兵丁

七百名星速赴營聽候差遣至所獲番人容當提
訊明確分別辦理臣現擬赴章谷地方督兵前進

奏入

上諭軍機大臣曰據阿爾泰奏宋元俊進攻小金川奪
回賊人所佔明正地方一摺所得不過納頂邊谷數
處何至過涉誇張輒稱全勝且斬馘尚有實據可稽
自不敢捏詞粉飾若所稱墮崖落水死者不計其數
乃綠營虛誑惡習阿爾泰何竟信而不疑形之章奏

乎我兵此時尚未深入即明正被侵之地所復亦僅一隅不足言捷而阿爾泰遠有報功之色窺其意總圖姑息苟安設或此時逆酋出而認罪求饒阿爾泰必將遷就此斷不可小金川屢經該督等曉諭遵依復敢反覆滋釁若又因其請而用之彼益輕視大臣為無用我兵甫撤賊衆旋屯更復成何事體況僧格桑竟敢抗拒官兵實為可惡尤不可不大示懲創總以剋期覓道進兵擣其巢穴擒獲兇渠將僧格桑之

妻孥近族及其黨惡頭人盡行俘係請旨辦理其事
方能完結至土練一項向多臨陣易退且派自各土
司恐於賊人瞻顧不肯向前或致泄漏機密今此次
奪回明正地方土兵尚覺出力是此輩又未嘗竟不
可用惟在善為駕馭令其奮勉向前耳著傳諭阿爾
泰仍照前酌量調撥土練但須慎選精壯得力之人
勿令以老弱充數並當與官兵相間配用毋使獨當
一面致其游移退怯

同日德福奏言臣在省時查阿爾泰所辦吏務案卷並詢問臬司李本等知阿爾泰自五月間辦理軍務以來已經抽調北路駙馬四十二匹僱民馬九十四匹在兩路安設臺站遞送文報又動撥各州縣倉糧碾米三萬二千六百餘石僱募長夫二千九百餘名陸續背運至運送軍裝火藥鉛彈派令經由州縣僱募短夫按站遞送均已不致缺誤因起事之初阿爾泰以為帶兵數百名親往曉諭

兩金川自當退地歸巢即能完事是以未經具奏
令兩路漢土官兵業已調至一萬有餘故臣在省
之日即委按察司李本會同布政使劉益等設立
總局凡關涉兩路軍務悉由總局承辦事竣之日
循照十二三年本省用兵成案核實報銷奏入報

聞

壬子董天弼奏言臣失守之德爾密畢旺拉連日
密探情形小金川添兵守卡已有負固之勢但達

木巴宗被困已久急宜救援臣復查得木坪之堯磧一處從山梁而下行數十里中隔一河河北即係達木巴宗小金川曾於河之兩岸各修碉房一座但尚可乘其不備力為攻破若由捷徑前往不過十餘日可到臣一面帶兵五百名星速起程一面飛商阿爾泰德福如其意見相同即將派就之漢土官兵二千名陸續隨行其餘兵數均留與福昌管轄仍於各要口屯札臣務期設法渡河首

先攻至達木巴宗斡絕賊番歸路則福昌亦可乘
勢徑進再臣前奏之甲金達曾頭兩路可以進兵
查曾頭溝道經梭磨卓克采土司稍覺迂遠其甲
金達一處已經阿爾泰派有遊擊陳聖矩帶兵前
往相機辦理臣現議用兵堯磧木與甲金達相近
俟救援達木巴宗復還鄂克什後將福昌及臣所
統兵并分於此兩路并攻奏入奉

上諭曰此行頗覺勇往看汝如何以功抵過耳

平定兩金川方畧卷七